

YONI MA KANÚ MANAUSÍEN UVANTEIN BOMPON MINO (3 Yoni)

Yoni Ma Kanú Manausíen Bompon Uvanteí Pákenai Afova Vaya Ino

Ma vompon ma uvantein banta ino.

Bayá varen orin banta Yoni vei furin ádesí ukhan ma uvarein mino.

Uvarein orana ino.

AD nainti (90) ráké mana antareti (100) ráké mai aúban mino.

Ma vompon ma uvantein baru ino.

Efesasí barurá ino.

Ma vompon ma uvaman amikhein kéká ino.

Romú kéká ano Khaiusin bí kokhon banta ayí daran ban mino. Auyen avúavá ma uvantein bompomin (Niu Testameni) ma Khaiusin bí bain mai Koriní barurá ban (Romu 16:23, 1 Korini 1:14) Masedoniá barafá ban (Aposeri 19:29) inká Debí barurá ban ukhen mino. (Aposeri 20:4, 5) 3 Yoni vompomin ma vain banta ída mai vanta kayo vá manaí ukhen mifo manaí ukhein bí bain banta inon ten afova vanta kayo inikhen mino.

Nái ana vará ma vompon uvanten nafino.

Khaiusini mumunan má monó nanin banta ma ven amá orin ma avábá uantiyá ein ma san

mi susu sian ten mino. Diotrefesin ne sin banta ano monó ayain banta kayo namuroí uantian mi Khaiusi mantaan ákona ino van Yoni ano vaya siamen mino.

Yonini Amusin Baya Ino

¹ *Téi Yisasintá ma mumunan iyain nanin bantai yoran bantan báké

éi sesi kama sirona uron mi Khaiusi van ná éin nan purasé tinunu iyákéi ma vompon uvaman amé uno.

² Téi ma sinunu ukheruna sirona oe, éin aú iyampon mano kama ukhái eni yante vukhafa vá ano yere ákona ukhantiya amusin iyáke minó daná kama e varano van mi simúkuantiyá uno.

³ *Éi inte avúavá kasá bákeyá pura vaya ánaín dakhafiyafa mai manáa sifá tiváeyan mano séin me sisimí iniréi kákán timusin é uno. ⁴ Te sikhafana ano ma fura sikhein bayá ánaín ma vakuriyáin bayá ma séi iniyáké mai ena yanáká ma simusin iyaruna simusin esantaréi moeké timusin uantiyá uno.

Bafani Yoran Banta Kaylorá Ma Kamaen Dafísí Pákena Ma Ákona En Tein Baya Ino

⁵ Téi ma sinunu ukheruna sirona oe, mireníe ena fáké monó doran banta kéká ano ma esanten oriya ma e amápin avían kaúde yafisiyaona avúavá mai Tiyarafenui kama yoraríi iya ono.

⁶ *Éi ma vetin avábá ure kama avúavá aní iyaona vaya van mará ma vain monó nanin banta siamíkan inen mino. Betí ankan ma éin

* **1:1:** Apo 19:29; Rom 16:23 * **1:3:** 2Yn 4 * **1:6:** Tai 3:13

me ampiren orono van iyantiya vá Tiyarafenu ano ma amusin ukhan nain aa sákesá manáa yanásinta aya esin ná mamaren orino. ⁷* Mai fara vara seyo, vetí ankan Bafani yoraríi en nóken pasen afokhampín ma vain nanin banta finté ída mana ayain daná baré iyan mino. ⁸ Mai vará máan banta kéká kama avúavá aní erá mai kéká aya iyáké inká manafiní uverá Tiyarafenu fura avúavá tian banasi amé tifano.

⁹ Monó nanin bantafin ma afova vompon uvamádékun orikhan mifo mai ma veyan ánon bantai ono van iyain banta Diotrefesi ano ída mana yanásí inten mino. ¹⁰ Téi ma oronté béis ma setin nan namu yorarí iyan mino sen ma soyampá baya siren namu vaya kayo siyain nan éin mo siamenté uno. Ena fáke monó doran banta kéká ma ída ve amápin o avíon kaúden ída kama iyáken inká betin ída aya ino van ma monó nanin banta siamiyain nan deren tiamenté uno. Mán banta kéká ma aya iyain nanin banta mai monó namun pinte véi ano yo sianté iyan mino.

¹¹*Téi ma sinunu ukheruna sirona oe, ída vá máan avúavá ena nanin banta aní iyáke kama avúavá ánaín mana vá dakhafono. Kama avúavá ma varé iyain kayo ano aníen Tiyarafenu vanasi uno sé iyan mifo namu avúavá ma variyain kayo ano mai Tiyarafenu ída afová ukhé uno sen aní é iyan mino. ¹² Mán té iyan mifo minó ano Demetriusini kama avúavá bá inká béis ma fura vaya siamiyain mái sian dákó iyan mino. Tetí ankan má dere ma veni kama avúavá san tian

* **1:7:** 1Ko 9:11-12 * **1:11:** 1Yn 3:6-10

dákó iyaruna mai saretí ankan afová ukhen nái fura vayan tiyá uno.

Ma Sipá Ma Kípan Baya Kayo Ino

¹³ *Téimpin kokhon baya kayon bái éin tiamento van inikhé umpo ída vompompin uvaman amenté uno. ¹⁴ Mai fara vara seyo, seyantá tiretin o oniyáku sen má baya seno van mi inikhé uno.

¹⁵ Tiyarafenui ará kusin mano éin masá bano.

Mará ma vain arona kayo ano vetíi amusin baya siádan éi vaonafá oren mino. Tenti simusin baya yere maifá ma vain tirona kayo vá mana mana arariya siameno.

* **1:13:** 2Yn 12

YISASINI KAMA VAYA
The New Testament in the Agarabi language of Papua
New Guinea
Nupela Testamen long tokples Agarabi long Niugini

Copyright © 2010 The Bible Society of Papua New Guinea

Language: Agarabi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

PDF generated using Haiola and XeLaTeX on 11 Nov 2022 from source files
dated 22 Nov 2019

105c264e-e2fa-503a-9726-8b662c09b700